

LATGALIŠU GAZETA

Pusnakts sarunys



Treis puīši apsprīž dažādu nūtykumus, sovīm spēkim veidoj audioradejumu i tuo īrokstus pīduovoj kotram nūsaklauseit šķārsteikla lopā LaKuGa.LV

Jureits

Šoleidz vys vēl da golam nav skaidreibys par leidz šam vīneiguos latgaliski raidūšuos regionaluos stacejis "Latgolys Radeja" darbeibys nuokūtni, latgališu radūšajim pruotim nav mīra i teik maklāti vysaiduoki cytaiduoki rysnuojumi tikt sadzierdātīm.

Ir sastūpami atseviški radio kanali, kas raida muzyku izmontojūt šķārsteikla īspiejis – tai saucamuos interneta radejis. Bet vēl vīnu jaunu ideji saplanovuojuši treis puīši nu Daugavpiļs – jī kotru nedeli taisa sovu audio raidejumu, īroksta tū i pīduovoj golarezuļtatu nūsaklauseit šķārsteikla lopā LaKuGa.LV. Itū raidejumu ar nūsaukumu "Pusnakts Triādis" veidoj Juoņs Rimi-

cāns, Aivars Buļs i Arņs Slobožanins.

"Latgališu Gazeta" vaicova A. Slobožaninam, kai roduos dūma taiseit raidejumu "Pusnakts Triādis" i nu kurinis itaids nūsaukums? Kū nūzeimej nūsaukuma ūtrais vuords?

Muzykā "triāde" asūt treju skaņu sakūpuojums, kas veidoj harmonisku akordu. Arņs ar Aivaru i Juoni ir pazeistami jau kaidu laiceni, i vīnmār ir lūbejuši sovā storpā parunot par vysaidom litom, puorrunot nūtykumus i īspiejamuos savstarpejuos sakareibys, pasastreideit i varbut ar pasamīt par vīnu voi ūtru problemu. Tai pa mozam roduos dūma, kura atsateisteja leidz taidam improvizaciju raidejumam, kuramā, kai jī poši atzeimej sovā audio

reklamys rulleitī, "runoj par vysa kū i ni par kū".

Kotrs nu raidejumim teik taiseits tai: vysy treis puīši, parosti ūtardīņuos, sasateik pi Arņa dzeivūklī, nūlik pa vyds ustobai pi datora daslāgtu mikrofonu i suoc diskuseji. Pymra tuo vīnu voi divejis dīnys īpīršk izdūmoj i sarunoj tematu – tai sait laiks kotram apdūmuot sovu redzīni konkretajā vaicuojumā, i tod jau puorejais nūteik iz vīty, puorsprīzūt tematu nu vysu īspiejamūs pušu. Tai vīna raidejuma plynais laiks var īlgt leidz pat stuņdes garumam.

Da ituo "Pusnakts Triādis" temati bejuši vysdažaiduoki: par krīzi vaļstī, par nūtykumim saisteibā ar "Latgolys Radeji", kai ari daudz prostuoki vaicuojumi, pīvadumam – par tautys dejom...

Vēl vīns raidejuma dali-

nīks, J.Rimicāns, atzeimej, ka taiseit deļ tam ari sarunys nūteik vokorūs, parosti piec 23:00 stuņžu – tod var daudz naformaluok i breivuok runuot par litom, kurys dīnys laikā teik apsprīstys puoruok konservatīvi. Pīvadumam, pādeja "Pusnakts Triādis" raidejums ir par muzykys i video īrokstu piratismu.

Nikaidus lelūs raidejuma atteisteibys planus puīši nādūmoj – itaida sasatikšona kotru nedeli ir jautrys nūtykums, i deļ tam, kai poši apgolvoj – raidejums byus, kamer byus par kū runuot i kū apsprīst.

Ka jiusim vēl naizadeve nūsaklauseit kaidu nu "Pusnakts Triādis" raidejumim, tod drūši apsaverit šķārsteikla lopā LaKuGa.LV – tī jiusim teik dūta itaida vareiba. Kai ari, ja jiusim ir kaidi komentari, irūsnuojumi voi kritika raidejuma veiduotuojum, tod varit tū syuteit iz e-postu: triade333@inbox.lv

Latgališu-latvišu-krīvu sarunu vuordineica

Ir izguojuse latgališu-latvišu-krīvu sarunu vuordineica, kū sagataviejuši volūdnieki: Sanktpeterburgys universitatis dr. Aleksejs Andronovs i Latvejis universitatis dr. Lideja Leikuma. Vuordineicys izdūšonu atbaļstiejuse Latvišu volūdys apgivis vaļsts agentura, i 23. febrali Reigā nūtyka vuordineicys pīrškā stateišonys pasuokums.

A.Andronova i L.Leikums izstruoduotuo "Latgališu-latvišu-krīvu sarunu vuordineica" vysu vaira paradzāta Sibira latgališim, jūs vajadzeibom, tok jū var litu-

ot i daudz vaira cylvāku – sevkurs interesents, kurs runoj latgaliski, latviski i krīviski, tai pat ari itūs volūdu apgiveji.

Sarunu vuordineicā īlyk-

tys kasdīnā bižuok lituotuos temys, vuordi i izteicīni. Tys ir interesnys, sovpatēigs i lelā mārā novatorisks dorbs.

Gatavejūt jū, autori ir sasadyuruši ar daudzim latgališu rokstu volūdys praksis, seviški pareizrūnys, vaicuojumim. Deļ tuo gaida, kab kolegys itu ar isacejumim ituo dorba plynveidošonai, kai ari kab i cyti pīsavārstu da ituo naatrysnuotom latgališu rokstu

volūdys kūpšonys litom.

Gruomotys prezentacejis pasuokumā L. Leikuma i A. Andronovs pastuosteja par vuordineicys tapšonys īmeslim, gryuteibom, izvīrātājam mierkim, sasnigtū, dalejās ar rūsynuojumim i idejom turpnuot dorbu latgalistikā.

Paradzams, ka vystyvuokajā laikā itei vuordineica byus nūpīerknama ari šķārsteikla veikalā madeinlatgola.lv.

Kū vaira volūdu, tū lobuok! **LaKuGa.LV**

NŪTIKŠONU KALEŅDERS

● Pikets latgališu volūdys lītuošonys atbolstam plašsazinis leidzekļūs

27.02.2009., nu 12:00 leidz 13:00 stuņžu Reigā pi Nacionaluos radio i televizejis padūmes iejis durovu Smilšu ilā 1/3

Pikets ir pīsaceits i saskaņots ar Reigys piļsāty pasvaļdeibu. Piketa organizators – "Latgolys tradicionaluos kulturys centra "Latgaļu sāta" bīdrs Mareks Gabrišs.

Volūdu i kuļturu dažaideiba ir boguoteiba. Volūdys vairs natiek uzvertys tikai kai sazinis veids, bet kai nacionaluos identitatis pamats. Deļ tuo kotra volūda ir saudzejama vierteiba, naatkareigi nu tuos runuotuoju skaita i ekonomiskuos vierteibys. Piketa organizatoru mierkis ir panuokt latgališu volūdys vītu vaļsts apmokuotūs plašsazinis leidzekļūs, atbilstūši tuos lītuotuoju skaitaim vaļstī. Kai ari vajadzeigs sistematisks i regulars atbolsts regionalajim plašsazinis leidzeklim, kas sovā darbeibā montoj latgališu volūdu.

Vairuok informacejis šķārsteiklā: LaKuGa.LV

● Sibira dīna Kruoslovā

01.03.2009., Kruoslova, Kruoslovys kulturys noms Kruoslovā ituo goda 1. martā nūtyks Sibira dīna. Tiks paruodeiti storptautiskajuos etnolingvistiskajuos ekspedicejuos iz Sibiri īgiuti materiali – kinys, kartenis, īroksti, stuosti i sarunys.

Ekspedicejis ar Vaļsts Kulturkapitala fonda i Latvejis Universitatis atbolstu jau vairuok godu reikoj volūdneica dr. Lideja Leikuma sadarbībā ar Latvejis Universitatis, Sanktpiterburgys Vaļsts universitatis, Ačinskys Pedagogiskuos koledžys pasnīdziejim i studentim i "Latgolys Studentu centra" bīdrim.

Niu ir īspieja apsavērt atvastūs materialus i satikt pošus ekspediceju daleibnīkus, aizdūt vaicuojumus, apsarunot i izzynuot vaira – kaidi ir Sibira latgališi niu, 21. godu symtā.

Dīnys parāds:

09:15 – Dīvakolpuojums latgaliski – Kruoslovys Sv. Ļudvika Romys katuoļu bazneicā (Bazneicys ilā 2)

11:00 – Seminars "Pi Sibira latgališu" – Kruoslovys kulturys nomā (Reigys ilā 26)

Pīsadola Sibira ekspediceju braucieji, ansamblis "Sovvaļņiki"; stuostejumi par dazynuotū; D. Juragys videomateriali; puorskota prezentaceja "Ekspedicejis pi Sibira latgališu" (~ 70 min.)

12:30 – "Ceļā satyktais" (spylgtuokuos epizodis par ekspedicejuos satyktājam ļaudim, nūtykumim; dzismis; D. Juragys, L. Lindes dokumentaluo filma "Tuoli dzeivoj muni meilī. Zīmys škola Ačynskā" (~ 80 min.)

15:00 – Foto izstuodis "Pi Sibira latgališu" atkluošona – Kruoslovys Viesturis

i nūvodpietnīceibys muzejā (Pils ilā 8)

Dzīduošona, diskusejis, čajs

Vairuok informacejis šķārsteiklā: LaKuGa.LV

● Bīdreibys "Latgolys Studentu centrs" bīdru Kūpsapuļce

28.02.2009., Reigā, Slūkys ilā 37

Suokums 12:00 stuņdēs. Bīdreibys dorba goda puorskota pījimšona, vaļdis vīleišonys, atskaitē par padareitū 2008. godā, plani nuokūtnē i citi vaicuojumi. Piec kūpsapuļcis dorbs grupuos pi nuokamajim LgSC projektim.

"Latgališu Gazetu" atbolsta atgolys regiona atteisteibys agentura i Kulturkapitala fonds.

